

Illioriternernut aningaasalersuineq pillugu Inatsisartut inatsisaat

Kapitali 1

Atuuffia

§ 1. Inatsisartut inatsisaat una illunik sanaartornermut, iluarsaassinermut, allilerinermut pitsangorsaanermullu taarsigassarsinermut atorneqarpoq.

Imm. 2. Inissianut inuussutissarsiutnik ingerlatsiffingeqartussanut imaluunniit ingerlatsiviusunut taarsigassarsisitsisoqarsinnaanngilaq. Taamaattorli inuussutissarsiutit annikinnerusut namminersorfiusut tassani pineqanngillat.

Imm. 3. Inissianik sanaartornermut, iluarsaassinermut, allilerinermut pitsangorsaanermullu pisortanit tapiiffingeqartut, tapiissutit imaluunniit aningaasalersuineq pillugu inatsisinut allanut ilaasunut inissianut taarsigassarsisitsisoqarsinnaanngilaq.

§ 2. Inissianik sanaartornermut, pitsangorsaanermut, iluarsaassinermut imaluunniit allilerinermut piffissami sanaartornermi pilersaarisornermilu inatsimmik atuuttumik naammassinnittumik sanaartornernut taamaallaat taarsigassarsisitsisoqarsinnaavoq.

§ 3. Taarsigassarsisitsinissamut neriorsummik tunniussisoqannginnerani sanaartornissamut pituttusumik isumaqtigisiussiorfiusimannngitsunut imaluunniit sanaartornermi sulinernut aallartinneqarsimannngitsunut taamaallaat sanaartornernut taarsigassarsisitsisoqarsinnaavoq.

Kapitali 2

Nutaanik illioriternernut taarsigassarsineq

§ 4. Inissiat nutaat sanaartornerinut aningaasartuutit tamarmiusut ilaannut aningaasalersorneqarnissaannut kommunalbestyrelsi taarsigassarsisitsisinnaavoq, tak. §§ 5-8.

Imm. 2. Inissiami inissiap annertussusia 110 m^2 tikillugu annerpaamik taarsigassarsisitsisoqarsinnaavoq, inissiap anginerunera apeqqutaatinnagu.

Imm. 3. Sanaartornermut aningaasartuutit tamarmiusut m^2 -imut ataatsimut annerpaamik 20.000 kr.-inut taarsigassarsisitsisoqarsinnaavoq, aningaasartuutit annertuneruneri apeqqutaatinnagit.

§ 5. Nuummi aningaasartuutit tamarmiusut 27 %-ii tikillugit kommunalbestyrelsi nutaamik inissialiornissamut taarsigassarsisitsisinnaavoq, taamaattorli § 4, imm. 2 naapertorlugu annerpaamik

naatsorsorneqartumik tassa 594.000 kr.-inik annerpaamik taarsigassarsisitsisoqarluni, taamaattoq tak. imm. 2 aamma 3.

Imm. 2. Imm. 1 malillugu taarsigassarsisitsineq imatut annikilliartortinnejassaaq:

- 1) 2019-imi taarsigassarsisitsinissamut neriorsuutinut 24 %-it, tassa annerpaamik 528.000 kr.-inik taarsigassarsisitsineq
- 2) 2020-mi taarsigassarsisitsinissamut neriorsuutinut 21 %-it, tassa annerpaamik 462.000 kr.-inik taarsigassarsisitsineq
- 3) 2021-mi taarsigassarsisitsinissamut neriorsuutinut 18 %-it, tassa annerpaamik 396.000 kr.-inik taarsigassarsisitsineq
- 4) 2022-mi taarsigassarsisitsinissamut neriorsuutinut 15 %-it, tassa annerpaamik 330.000 kr.-inik taarsigassarsisitsineq
- 5) 2023-mi taarsigassarsisitsinissamut neriorsuutinut 12 %-it, tassa annerpaamik 264.000 kr.-inik taarsigassarsisitsineq
- 6) 2024-mi taarsigassarsisitsinissamut neriorsuutinut 9 %-it, tassa annerpaamik 198.000 kr.-inik taarsigassarsisitsineq
- 7) 2025-mi taarsigassarsisitsinissamut neriorsuutinut 6 %-it, tassa annerpaamik 132.000 kr.-inik taarsigassarsisitsineq
- 8) 2026-mi taarsigassarsisitsinissamut neriorsuutinut 3 %-it, tassa annerpaamik 66.000 kr.-inik taarsigassarsisitsineq

Imm. 3. 2027-mi januaarip aallaqqaataanit sunniuteqalersumik Nuummi taarsigassarsisitsinissamut neriorsuinerlik nalunaaruteqartoqarsinnaanngilaq.

§ 6. Qaqortumi, Sisimiuni aamma Ilulissani kommunalbestyrelsi aningaasartuutit tamarmiusut 30 %-ii tikillugit nutaamik inissialiornissamut taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 660.000 kr.-inik annerpaamik taarsigassarsisitsisoqarluni.

§ 7. Maniitsumi, Aasianni aamma Tasiilami kommunalbestyrelsi aningaasartuutit tamarmiusut 35 %-ii tikillugit taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 770.000 kr.-inik annerpaamik taarsigassarsisitsisoqarluni.

§ 8. Illoqarfinni nunaqarfinnilu §§ 6 aamma 7-imi taaneqanngitsuni kommunalbestyrelsi aningaasartuutit tamarmiusut 40 %-ii tikillugit taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 880.000 kr.-inik annerpaamik taarsigassarsisitsisoqarluni.

§ 9. §§ 5-8 naapertorlugu taarsigassarsisitsineq taamaallaat pisinnaavoq sanaartornermi aningaasartuutit tamarmiusut sinneri taarsigassarsisup nammineq aningaalersorpagit.

§ 10. §§ 5-8 naapertorlugit taarsigassarsisitsinerit inissiami qularnaveeqqusiusinikkut qulakkeerneqassapput. Sanaartornermi aningaasartuutit tamarmiusut sinnerisa sillimmasiinermullu akiliussinerit aningaasalersornissaannut inissiami qularnaveeqqusiusilluni taarsigassarsineq taarsigassarsisitsinerit ataqqissavaat.

Imm. 2. Taarsigassarsiat atulernissaanut akuersissummut ulluliussamiit ukiuni 20-ni

ernialersorneqarnatillu akilersugassaanngillat, tamatumalu kingorna Nationalbankip erniaritittagai procentinik pingasunik ilallugit erniaqartinneqarlutik amerlaqtigiiinnik annertussusilerlugin ukiuni 15-ini akilersugassanngussallutik. Taarsigassarsinermi allagartap qanoq iluseqarnissaa suullu piumasaqaataassanersut communalbestyrelsimit aalajangersarneqassapput.

Imm. 3. Taarsigassarsiat akilersornissaannut akiligassallu akilersornissaannut maleruagassanik Naalakkersuisut aalajangersaasinnaapput.

§ 11. § 10, imm. 1-imni illunut pineqartunut atatillugu piginnittut nikinneri tamaasa pillugit communalbestyrelsi ilisimatinneqartassaaq. Piginnittut nikinnerini §§ 5-8 naapertorlugit taarsigassarsiat akiligassanngortinneqassanngillat.

Imm. 2. Piginnittut nikinnerini tamani communalbestyrelsip taarsigassarsisitsinerani taarsigassarsiat atsiorneqarnerisa angissusiata 15 %-iatut annertutigisumik piginnittut nikinnerannut akiliutissaq akilerneqartassaaq. Kommunalbestyrelsip taarsigassarsisitsineranik tigusinermut piumasarineqarpoq piginnittut nikinneranni akiliutip akilerneqarnissaa.

Imm. 3. Atulernissaanut akuersissutip tunniunneqarnerata kingorna qaammatinik arfinilinnik kingusinnerusumik pisunut inissianik nutaatut sanaartorneqartunik tunisineremi taarsigassarsitinneqarnissamut neriorsummik tunniussineq piginnittut nikinnerattut isigineqarpoq piginnittut nikinneranni akiliummik akiliisussaaffiusoq.

Imm. 4. Piginnittut nikinnerini, pisumit tiguneqartut taarsigassarsiat katinneri aamma niuernermi aningaasartuutit missiliussat tapiliunneri ilanngaatigalugit pisineremi akip 90 %-iinik annerpaamik aningaasartaqartut taarsigassarsiat communalbestyrelsip taarsigassarsiarititaasa ataqqissavai.

§ 12. Kommunalbestyrelsip §§ 5-8 naapertorlugit taarsigassarsiarititai akiligassaatinneqassapput:

- 1) Erniat taarsigassarsialluunniit akilersuutit akilerneqanngippata, aamma illumi qularnaveeqquissaqarluni taarsigassarsinermi allagartaq naapertorlugu erniat akilersuutillu akilernissaat pillugu maleruagassat malillugit piffissaliussap naanissaa sioqquillugu akiligassanik akiliinngisanik taarsigassarsisoq akiliisimanngippat, tak. qularnaveeqqut pillugu Kalaallit Nunaannut inatsit.
 - 2) Taarsigassarsisoq inissiamik illersorneqarsinnaasumik aserfallatsaalialiisimanngippat, paasineqarpallu communalbestyrelsip qularnaveeqquissutikkut qulakkeeriffigisa taamaalilluni ajornerulersoq.
 - 3) Taarsigassarsisup inissiaq ikuallattoornissamut illullu ajoqusersinnaaneranut sillimmasesimanngippagu.
 - 4) Inissianik attartorneq pillugu inatsisartut peqqussutaanni attartortitsineq pillugu aalajangersakkanut akerliusunik inissiamik taarsigassarsisoq attartortitsippat.
 - 5) Inissiami ininik inuussutissarsiorfiusunik aaqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiutilli annikinnerusut namminersorfiusullu pineqanngillat.
 - 6) Taarsigassarsisoq piginnittut nikinneri pillugu taarsigassarsisitsisumut nalunaaruteqanngitsoorpat aamma pisunik utoqqatsissutaasinaasunik peqanngippat.
 - 7) Piginnittut nikinnerini piginnittut nikinnerini akiliummik taarsigassarsisoq akiliinngitsoorpat.
- Imm. 2. Imm. 1, nr. 4 taamaaqataanik atorneqassaaq inissiaq inatsisitigut pisinnaatitaasumut pisussaatitaasumullu attartortinneqarpat.*

Kapitali 3

Ilunik pioreersunik iluarsaassinerit, pitsanngorsaanerit allilerinerillu

§ 13. Kommunalbestyrelsi inissiat pioreersut iluarsaannerinut, pitsanngorsarnerinut allilerneqarnerinullu tassani aningaasartuutit tamarmiusut 40 %-ii tikillugit taarsigassarsisitsisinnaavoq taamaattorli annerpaamik 300.000 kr.-inik.

Imm. 2. Inissiamut ataatsimut iluarsaassinerut, pitsanngorsaanernut imaluunniit allilerinernut ataasiaannarluni taarsigassarsisitsisoqarsinnaavoq.

Imm. 3. Allilerinerup kingorna 110 m²-imik annertunerusumik angissuseqartunut inissianut allilerinermut taarsigassarsisitsisoqarsinnaanngilaq.

§ 14. § 13 naapertorlugu taarsigassarsisinsinermut piumasarineqarpoq:

1) Inissiaq inissiamik piginnittumut, taassuma appaanut imaluunniit meeqqanut inersimanngitsunut inissiatut atorneqassasoq.

2) Inissiaq piffissami qinnuteqarfiusumi ukiunik 20-inik pisoqaanerussasoq.

3) Inissiaq ikuallattoornissamut illullu ajoquersinnaaneranut sillimmaserneqarsimassaaq aamma sillimmasiinermi akiliutissatigut kinguaattoortoqarsimanani.

Imm. 2. Iluarsaassinerut, pitsanngorsaanermut allilerinermullu aningaasartuutit tamarmiusut sinnerinut taarsigassarsisoq nammineq aningaasalersuissappat taamaallaat taarsigassarsisitsisoqarsinnaavoq.

Imm. 3. Aappaasumut sanilliunneqarpoq nalunaarsorsimalluni aapparisaq, imaluunniit ukiuni 2-ini kingullerni inooqatigiissimappata, katissimanermut assingusumik inooqatigiinneq.

§ 15. Inuulluarniutitut taaneqarsinnaasunut iluarsaassinerut imaluunniit pitsanngorsaanernut taarsigassarsisitsisoqarsinnaanngilaq.

§ 16. Inissiami qularnaveeqqusiusinikkut qulakkeerneqartumik taarsigassarsiatut ernialersorneqanngitsutut akilersugassaanngitsutullu taarsigassarsisitsisoqassaaq. Inissiami qularnaveeqqusiusinikkut taarsigassarsiaasinaasut allat taarsigassarsinerup ataqqissavai.

§ 17. Kommunalbestyrelsip taarsigassarsisinsinera, tak. § 13 piginnittut nikinnerini akiligassanngortinneqassaaq, appariit akornanni piginnittut nikinneri eqqaassanngikkaanni aamma averusernermut imaluunniit avinnermut atatillugu piginnittut nikinneri imaluunniit kommunalbestyrelse allamik aalajangiisimanngippat.

§ 18. Kommunalbestyrelsip taarsigassarsisinsinera tak. § 13 aamma akiligassanngortinneqassaaq:

1) Taarsigassarsisoq inissiamik illersorneqarsinnaasumik aserfallatsaaliisimanngippat, kommunalbestyrelsillu paasippagu kommunalbestyrelsip qularnaveeqqusiusutikkut qulakkeeriffigisaa taamaalilluni ajornerulersoq.

2) Taarsigassarsisup inissiaq ikuallattoornissamut illullu ajoquersinnaaneranut sillimmasersimanngippagu.

3) Inissianik attartorneq pillugu inatsisartut peqqussutaanni attartortitsineq pillugu aalajangersakkanut akerliusunik inissiamik taarsigassarsisoq attartortitsippat.

4) Inissamiininik inuussutissarsiornermut aaqqissuussisoqarsimappat imaluunniit inissiamit inuussutissarsiummik ingerlatsisoqarpat. Inuussutissarsiutilli annikitsut namminersoriusullilaanngillat.

5) Inissiaq taarsigassarsisitsumut initut atorneqannangippat.

Imm. 2. Imm. 1, nr. 3 taamaaqataanik atorneqassaaq inissiaq inatsisitigut pisinnaatitaasumut pisussaatitaasumullu attartortinneqarpat.

Kapitali 4

Illunik pioreersunik soraarnermusialinnut pigineqartunik iluarsaassinerit

§ 19. Soraarnermusialimmit inissiatut atorneqartunut aamma soraarnermusiaqartoq taassumalu appariunnagaa marluullutik inissiamik kisiimillutik pigineqartumut inissiamik pioreersumik iluarsaassinermut kommunalbestyrelsi 300.000 kr.-it tikillugit taarsigassarsisitsinnaavoq.

Imm. 2. Soraarnermusiaqartutut isigineqarput inuit utoqqalinersiuteqarnissamik, siusinaartumik pensionisiaqarnissamik pisinnaatitaasut imaluunniit tjenestemand-itut pensionisiaqartut.

Imm. 3. Aappaasumut sanilliunneqarpoq nalunaarsorsimalluni aapparisaaq, imaluunniit ukiuni 2-ini kingullerni inooqatigiissimappata, katissimanermut assingusumik inooqatigiinneq.

Imm. 4. Peqatigisaanik kapitali 3 naapertorlugu taarsigassarsisitsisoqarsinnaanngilaq.

§ 20. Inissiap atorneqarnerata imaluunniit atugaanerata allanngortinnissaanik siunertaqartunut imaluunniit kinguneqartunut imaluunniit inuulluarniutitut taaneqarsinnaasunut iluarsaassinerut pitsanngorsaanernullu taarsigassarsisitsisoqarsinnaanngilaq.

§ 21. Iluarsaassinissamut taarsigassarsisitsinissamut, tak. § 19 piumasarineqarpoq:

1) Iluarsaassinerup aningaasalersornissaanut aningaaserivimmi imaluunniit illummik qularnaveeqquasiilluni taarsigassarsisitsifarimmi nalinginnaasumik piumasaqaatit malillugit taarsigassarsinissamut itigartitaasimaneq.

2) Inissiaq ikuallattoornissamut aamma illup ajoquusersinnaaneranut sillimmaserneqarsimanissaa aamma sillimmasiinermi akiliutissani kinguaattoortoqarsimannginnissaa.

3) Inissiami piginneqataasup aappaasup iluarsaassinermut aamma taarsigassarsinissamut akuersisimanissaa.

§ 22. Kapitali manna malillugu inissiami tamarmiusumi qularnaveeqquusiussinikkut qulakkeerneqartumik taarsigassarsiatut ernialersorneqanngitsutut akilersugassaanngitsutullu taarsigassarsisitsisoqassaaq.

Inissiami qularnaveeqquusiussinikkut taarsigassarsiaasinaasut allat taarsigassarsinerup ataqqissavai.

§ 23. Kommunalbestyrelsip taarsigassarsisitsinera piginnittut nikinnerini akiligassanngortinneqassaaq, taarsigassarsisup taassumalu aappaata akornanni piginnittut nikinneri eqqaassanngikkaanni imaluunniit kommunalbestyrelse allamik aalajangiisimanngippat.

§ 24. Kommunalbestyrelsip taarsigassarsisitsinera tak. § 19 aamma akiligassanngortinneqassaaq:

- 1) Taarsigassarsisup inissiaq ikualattoornissamut illullu ajoquersinnaaneranut sillimmasesrimannngippagu.
- 2) Inissiaq attartortinneqarpat.
- 3) Inissiaq soraarnermusiaqartumut initut atorneqanngippat.
- 4) Inissiami ininik inuussutissarsiornermut aaqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiutilli annikitsut namminersoriusullu ilaanggillat.

Kapitali 5

Ataatsimut aalajangersakkat

Taarsigassarsinissamut qinnuteqaatinik aqutsineq il.il.

§ 25. Inatsisartut inatsisaat manna naapertorlugu suliamik suliariinninnermi aningaasartuutinut matussutissatut kommunalbestyrelsip taarsigassarsiaritatit 0,5 procentiinik annertussuseqartumik akileeqqusisoqassaaq.

Imm. 2. Piffissami taarsigassarsisup taarsigassarsiat tunniuteqqullugit kommunalbestyrelsimit qinnuteqarfingisaani taarsigassarsisup akitsuut kommunalbestyrelsimit akilissavaa. Taamaattoq taarsigassarsianik tunniussinermi akiliutissaq ilanngaatigineqassasoq, kommunalbestyrelsi aalajangersinnaavoq.

§ 26. Kommunalbestyrelsi qularnaveeqquisiinermut allagartap atsiorneqarneranut atatillugu suliamik suliariinninnermut akitsuummik 1.250 kr.-inik akileeqqusinissamut.

Imm. 2. Kommunalbestyrelsi aningaaserivimmut ataatsimut amerlanerusulluunniit qularnaveeqquisiinermi allagartap atsiorneqarnissaanut kiisalu akitsuummik akileeqqusinissamut piginnaatitsisummik tunniussisinnaavoq.

§ 27. Inissianik nutaanik sanaartornissamut qinnuteqaatit allakkatigut kommunalbestyrelsimit nassiunneqassapput.

Imm. 2. Qinnuteqaammut ilanngunneqassapput:

- 1) Pileraarummut nassuaat inissiat amerlassusaannut inissiamullu ataatsimut inissiap annertussusaa pillugu paasissutissanik imaqartoq.
- 2) Sanaartornermi aningaasartuutinut tamakkiisunut missingersuutit.
- 3) Kommunalbestyrelsimiit nunaminertamik immikkoortitsineq imaluunniit nunaminertamik tunineqarneq.
- 4) Nammineerluni aningaasalersuutissat pissarsiarisimanerinut uppernarsaat, tak. § 9.
- 5) Qinnuteqartup cpr. normua, najugaqarnermut allagartaq imaluunniit alla kinaassutsimik erseqqissumik takutitsisoq.
- 6) Qinnuteqartup pisortanut akiitsoqarnera pillugu Akiliisitsiniarnermut oqartussaniit nalunaarut.

Imm. 3. Qinnuteqaatit nassiunneqartut tunngavigalugit qinnutigineqartut aningaasaliissutigineqarsinnaanersut kommunalbestyrelsi isummissaaq.

§ 28. Inissiani pioreersuni iluarsaassassinernut, pitsangorsaanernut allilerinernulluunniit taarsigassarsinissaq pillugu qinnuteqaat, kapitali 3 aamma 4 naapertorlugu, kommunalbestyrelsimit allakkatigut nassiunneqassaaq.

Imm. 2. Qinnuteqaammut ilanngunneqassapput:

- 1) Iluarsaassassinamut, pitsangorsaanissamut allilerinissamulluunniit kissaatigineqartumut nassuaat.
- 2) Inissiaq pillugu nassuaat, tassunga ilanngullugit pisoqaassusaa, angisussaa qanorlu pitsaassuseqarnera.
- 3) Suliassami aningaasartuutinut tamarmiusunut missingersuusiaq.
- 4) Sulineq pineqartoq nunaminertamik tunineqarnissamik pisariaqartitsippat kommunalbestyrelsimit nunaminertamik immikkoortitsineq imaluunniit nunaminertamik tunineqarneq.
- 5) Nammineq aningaasalersuisinnaanermut uppernarsaat.
- 6) Qinnuteqartup cpr.normua aamma najugaqarnermut allagartaq.
- 7) Inissiamut piginnittuuneq pillugu uppernarsaat.
- 8) Qinnuteqartup pisortanut akiitsoqarnera pillugu Akiliisitsiniarnermut oqartussaniit nalunaarut.

Imm. 3. Qinnuteqaatit nassiunneqartut tunngavigalugit qinnutigineqartut aningaasaliissutigineqarsinnaanersut kommunalbestyreksi isummissaaq.

§ 29. 25.000 kr.-it sinnerlugit pisortanut akiitsunik akilerneqartussanik akiliisimanngitsumut qinnuteqartumut taarsigassarsisitsinissamut kommunalbestyreksi neriorsuuteqarsinnaanngilaq.

§ 30. Taarsigassarsinissamik qinnuteqaat kommunalbestyrelsimit akuerineqarpat taarsigassarsinissamut neriorsuut tunniunneqassaaq, tassanilu taarsigassarsiat annertussuserigallagassaat aammalu taarsigassarsinermi piumasaqaatit allassimassallutik.

Imm. 2. Kommunalbestyrelsip taarsigassarsisitsinerani aningaasaliissutaasunut tunngavigineqartuni aningaasartuutinut missingersuutini allanngortoqarpat, allanguinerlu taarsigassarsiat inaarutaasumik annertussusiannut sunniateqarpat, taarsigassarsinissamik qinnuteqartoq pisariaqanngitsumik kinguarsaanani tamanna kommunalbestyrelsimit nalunaarutigissavaa. Taamaattoqanngippat inaarutaasumik taarsigassarsiat neriorsuutigineqartuutit annertunerulersinneqarsinnaanngillat.

§ 31. Taarsigassarsiat inaarutaasumik annertussusaat sanaartornermi inaarutaasumik naatsorsuutit tunngavigalugit naatsorsorneqassapput. Sanaartornermi inaarutaasumik naatsorsuutit suliamut attuumassuteqanngitsumit uppernarsarneqassapput.

Imm. 2. Taarsigassarsinissamik qinnuteqartup nammineq sulinerata nalinga aningaasartuutinut tamarmiusunut ilaassanngilaq, tak. imm. 1. Tamannali sanaartornerup iluani taarsigassarsisoq ilequusumik suliffeqarneranut atasumik taarsigassarsisoq suliaqarpat atutissanngilaq.

§ 32. Inissiap sanaartorneqarnera, iluarsanneqarnera, pitsangorsarneqarnera allilerneqarneralu neriorsuutit allakkiap tunniunneqarneraniit ukiut marluk iluanni aallartinneqareersimassaaq kiisalu ukiut pingasut iluanni naammassineqarsimallunilu atorneqalereersimassalluni. Taamaattoqanngippat neriorsuut siumoortumik nalunaarutigineqarani atorunnaarsinneqassaaq.

Imm. 2. Taarsigassarsisoq neriorsuutit allakkiap tunniunneqarneraniit ukiut marluk iluanni suliniut aallartinneqarsimanersoq imaluunniit aallartinneqarsimanningersoq pillugu kommunalbestyrelsimit paasissutissanik nassiuussissaaq.

Imm. 3. Taarsigassarsisoq neriorsuutitut allakkiap tunniunneqarneraniit ukiut pingasut iluanni atuilernermut akuersissutip assilineranik communalbestyrelsimit nassiusssaaq.

Imm. 4. Kommunalbestyrelsi immikkut pisuni piffissami killissarititaasut imm. 1-im i allassimasuniit immikkut akuersissuteqarsinnaavoq.

Taarsigassarsianik tunniussineq

§ 33. Sanaartorneq, iluarsaassineq, pitsangorsaaneq imaluunniit allilerineq naammassineqarpat aamma sanaartornermi naatsorsuutit uppernarsarnejqarsimasut aamma qularnaveeqqusiussaqarluni taarsigassarsinermi allagartap uparuagassartaqanngitsup naqeqluarneranik nalunaarsorneqarsimasup naqissusernejqarsimasullu kiisalu ikuallattoornissamut illullu ajoquusernissaanut sillimmasiisimanermut uppernarsaatip takutinneqarnerisigut taarsigassarsiat tunniunneqassapput. Taamaattorli aningaasaliissutit communalbestyrelsip missingersuusiatut akuerisaanni ukiumi ilanngunneqarfianni ukiumi siusinnerpaamik taarsigassarsiat tunniunneqarsinnaallutik.

Imm. 2. Sanaartornermi allilerinermilu taarsigassarsiat pissarsiarineqarnissaannut aamma piumasarineqarpoq atulernissaanut akuersissuteqarnissaq.

§ 34. Inatsisartut inatsisaat una naapertorlugu taarsigassarsiartumut pisortanut akilernejqarsimanngitsunik akiitsoqartumut taarsigassarsiat tunniunneqarsinnaanngillat. Akiitsut akilernejqarsimanngitsut aaqqinnissaannut taarsigassarsiat Akiliisitsiniartarfimmuit communalbestyrelsip tunniutissavai. Nuussineq imaluunniit eqqartuussivikkut malersuineq naapertorlugu taarsigassarsianit iluanaarutissat sinneri taarsigassarsisumut imaluunniit pisussatinneqartumut tunniunneqassapput.

Imm. 2. Taarsigassarsiat tunniunneqarnissaat sioqqullugu communalbestyrelsi taarsigassarsisup pisortanut akiitsoqarnersoq pillugu Namminersorlutik Oqartussani Akiliisitsiniartarfimmuit nalunaarummik pissarsiniassaaq.

Illup angissusia aamma kvadratmeterimut akit

§ 35. Inissiap annertussusaa inissiami init tamarmik annertussusaattut naatsorsorneqassaaq, tak. imm. 2. Pequsiviit, quit, biilinut oqqussiviit, aneerasaartarfii imaluunniit biilit unittarfii, illup silammut iigaasa avataaniittut imaluunniit inissiamit immikkoortillugit inissitat naatsorsuinermi ilanngunneqassanngillat, taakku oqorsarlugit inigisassatut atorneqassanngippata.

Imm. 2. Inissiap annertussusaa imatut naatsorsorneqassaaq:

- 1) Naqqup ataani inissiap annertussusaa naqqup ataata silammut iigaaniit illup takissusaanut silissusaanullu amerlisitsilluni naatsorsuinikkut uuttorneqassaaq. Naqqup ataa tamakkerluni atorneqanngippat, inissiap annertussusaa illup iluani iikkat ininik immikkoortitsissutaasut qeqqaniit uuttusoqassaaq. Init nateqanngitsut naqqi tamakkerlutik cementimik beton-imiluunniit qallernejqarsimasut uuttortaanermi ilanngunneqassanngillat.
- 2) Inissiap quleriinnerni init quleriinni nalinginnaasumiitt inissiami ataatsimi silami iikkamiit imaluunniit qaliata silataani iikkamiit, tak. nr. 3, aamma inissiap avinnerata qeqqaniit annertussuseq uuttorneqassaaq. Iliaqtariinnut arlalinnut inissiani uuttortaanermi illup isua iikkatut inissianut immikkoortitsissutaasutut affartut nalilernejqartarpoq. Qisuit qalliutaasut marluuppata ataatsip uuttorneqarnera qisuup alliup

silataaniit uuttuisoqassaaq.

3) Qaliani inissiap annertussusaata naatsorsornerani, illup takissusaanut silissusaanullu amerlisitsilluni naatsorsuinikku uuttuisoqassaaq. Takissuseq inissiap quleriivini nalinginnaasuni uuttuisarnertut uuttorneqassaaq, silissuserlu silami qaliat qalliutaasa qalipaa naqqaniit 1,5 meterinik portussuseqartut akornanni uuttorneqassalluni. Illassutit, soorlu anilinganerit, iikkat inimut killiliissutaasut silataannit uuttorneqassapput.

Imm. 3. Naqqup ataani qalianilu init imm. 2, nr. 1-im iamma 3-mi taaneqartut aatsaat najugassatut ilusilersorneqarsimappata, init annertussusaat uuttortaanermut ilanngunneqassapput.

Imm. 4. Init aalajangersimasumik nateqanngitsut uuttortaanermut ilanngunneqassanngillat, taamaattorli tak. imm. 5.

Imm. 5. Inissiami majuartarfiit annertussutsimik uuttortaanermi inini quleriinni atorneqarfisaminni ilanngunneqassapput. Isertarfiit, majuartarfiit majuartarfillu sangoriaat ataatsimut atorneqartut, illup silammut iigaasa iluini inini kiassakkani inissisimasut angissusaannut naapertuuttumik uuttortaanermut ilanngunneqassapput, taamaattorli annerpaamik 11 kvadratmeterinik annertussusilerneqassallutik.

§ 36. Inissiap kvadratmeterimut akia inissiap sanaartornerani aningaasartuutit tamarmiusut inissiap initaanit tamarmiusunit agguarneqarnera tunngavigalugu naatsorsorneqassaaq.

Kapitali 6

Taarsigassarsiat inaarlugit akilerneqarneri

§ 37. Inissianik nutaanik sanaartornermut taarsigassarsiaasunik piffissaq sioqqullugu taarsigassarsisup taarsigassarsianik inaalaluni akiliinerani akiitsut sinneri ullormi qinnuteqaatip tunniunneqarnerani 3 %-imik ernialerlugin Nationalbankip erniaritittagai ilanngullugit akilersukkak kingumut naatsorsorneqassapput. Akiitsut sinneri taarsigassarsisup allakkatigut inaalilluni akiliinissaq pillugu noqqaaneranit aamma taarsigassarsiani piffissamut ernialersuiffunailu akilersuiffusussaangnitsumut sinneruttumut kingumut naatsorsorneqassapput, taamaattorli taarsigassarsiat tunniunneqarneranniit siusinnerpaamik ukiunut tallimanut.

Kapitali 7

Atulernissaanut, atorunnaarsitsinermut ikaarsaarnermullu aalajangersakkat

§ 38. Inatsisartut inatsisaat ulloq 1. januar 2018-imi atuutilissaaq.

Imm. 2. Peqatigisaanik illuliortiternermi aningaasalersuineq pillugu Inatsisartut peqqussutaat nr. 1, 7. maj 2007-imeersoq atorunnaarsinneqarpoq.

§ 39. Taarsigassarsiat aamma taarsigassarinissamut neriorsuinerit, ulloq 1. januar 2018 sioqqullugu tunniunneqarsimasut imaluunniit nalunaarutigineqarsimasut piumasaqaatit allangortinnagit ingerlatiinnarneqassapput.

Imm. 2. Inatsisartut inatsisaanni matumani § 37-mi pineqarput inissianik nutaanik sanaartornermut taarsigassarsiat aamma taarsigassarinissamut neriorsuineq 1. januar 2018-ip kingorna tunniunneqartut imaluunniit nalunaarutigineqartut.

§ 40. Qinnuteqartut, ulloq 1. januar 2018 sioqqullugu taarsigassarsinissaq pillugu neriorsorneqarsimasut taarsigassarsiallu tunniunneqarsimanatik, qinnuteqartoqarneratigut inatsisartut inatsisaanni matumani maleruagassat naapertorlugit taarsigassarsinissamut neriorsummik nutaamik nalunaarfigineqarsinnaapput.

Namminersorlutik Oqartussat ulloq 23. november 2017

Kim Kielsen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut